



## INTRODUCZIUN

DA MARCEL KÖHLE

*«Misericordia» e «perdun» ein dus cavazzins centrals egl evangeli da questa dumengia. Silla damonda da Pieder rispunda Jesus ch'ins dueigi perdunar a moda generusa ed illustrescha quei cun ina semeglia.*

*Mo tuttina tschentan biars la damonda: «Daco duei jeu insumma perdunar, tgei porta quei?» – Sch'ins vesa con crudeivel ch'ils carstgauns tractan in l'auter e cons ch'empredan nuot ord lur sbagls e puccaus, gie, lu san ins bein sedumandar daco ch'ins duei perdunar generusamein.*

*Tier il perdunar va ei buca mo per igl act, mobein era per la tenuta. – Misericordia e perdun entscheivan en nos cors. Sche nus sentin conta misericordia che Dieus schenghegia a nus, lu eis ei era pli sempel dad esser misericordeivels culs concarstgauns e da perdunar in a l'auter. – Perquei eis ei impurtont da rugar Diu ch'el detti a nus in cor misericordeivel e la forza da perdunar (sco el perduna adina puspei a nus). Aschia sa ei dar ina nova entschatta, e mintgin survegn ina schanza sch'el ha falliu. E quella schanza drova mintgin da nus adina puspei.*

## EVANGELI

Mt 18,21–35

<sup>21</sup>Lu ei Pieder vegnius neutier ed ha detg: Segner, contas ga hai jeu da perdunar a miu frar, sch'el fallescha encunter mei? Forsa tochen siat ga? <sup>22</sup>Jesus ha rispundiu ad el: Jeu ditgel a ti, buca tochen siat ga, mobein tochen siatonta ga siat ga.

<sup>23</sup>Il reginavel da tschiel ei numnadamein semeglionts ad in retg che leva far quen cun ses survients.

<sup>24</sup>Havend entschiet a far quen, han ins menau tier el in ch'era culponts ad el dieschmelli talents.

<sup>25</sup>Cunquei ch'el era buca buns da pagar, ha il patrun cumandau da vender el, sia dunna, ses affons e tut sia facultad per pagar il deivet. <sup>26</sup>Cheu ei il survient sefretgs avon ses peis ed ha rugau el: Hagies pazienza cun mei, e jeu vi pagar tut. <sup>27</sup>Il patrun ha lu giu cumpassiun da quei survient, ha dau liber el e relaschau tut siu deivet ad el.

<sup>28</sup>Mond giadora, ha quei fumegl entupau in da ses confumegls ch'era culponts ad el tschien denars. El ha cargau quel pil cavez e detg: Paga quei che ti eis culponts! <sup>29</sup>E siu confumegl ei sefretgs avon ses peis ed ha rugau el: Hagies pazienza cun mei, e jeu vi pagar tut. <sup>30</sup>Mo l'auter ha buca vuliu, mobein el ius ed ha fatg metter el en perschun, tochen ch'el hagi pagau il deivet.

<sup>31</sup>Vesend quei ch'era daventau, ein ses confumegls stai tut indignai. Els ein i ed han raquintau a lur patrun tut quei ch'era capitau. <sup>32</sup>Quel ha fatg vegnir il survient ed ha detg ad el: Ti miserabel cumpogn! L'entira summa che ti eras culponts a mi, hai jeu relaschau a ti, perquei che ti has rugau mei.

<sup>33</sup>Vesses buca era ti stuiu ver cumpassiun da tiu confumegl, sco jeu hai giu cumpassiun da tei?

<sup>34</sup>E plein gretta ha il patrun surdau el als sbiers, tochen ch'el hagi pagau igl entir deivet. <sup>35</sup>Aschia vegn era miu Bab celestial a far cun vus, sche scadin da vus perduna buca da cor a siu frar.